

PEDRO TỸ CARTA HAN MÃN

¹ Simão Pedro tỹ ãjag mỹ carta rán hã vễ. Jesus Cristo tỹ inh fễ vễ, sỹ ti rãnrãj han jé, sỹ tỹ ti apóstolo jễ jé. Isỹ ù tỹ inh mré Jesus Cristo ki ge kỹ nỹtĩ kar ag mỹ rán hã vễ. Topễ vỹ ẽg kuprễg, ùn jykre kuryj ẽn vỹ ẽg kuprễg, ẽg tỹ ẽg krenkren han mũ tỹ Jesus Cristo ki ge jé. Nén ù sér vễ, ti ki ge mũ ti.

² ãjag to sóg Topễ mré vĩ tĩ, ãjag tỹ ẽg Senhor tỹ Jesus Cristo ki kanhrãn há han jé, Topễ ki ke gé, ãjag tỹ koměr hã ti ki kanhrãn kãn jé. Kỹ tóg ãjag tar han ke mũ. Kỹ tóg ãjag krĩ tỹ kãnhvy' henh ke mũ gé.

Topễ tỹ ẽg kuprễg

³ Topễ ki kanhró ẽg tóg nỹtĩ. Ẽg kuprễg tóg, ti tỹ ẽg tar han jé, ti tar nĩ ẽn ri ke. Kỹ tóg ẽg tỹ ùn mág han ke mũ gé, ti tỹ tỹ ùn mág nĩ ẽn ri ke. Ẽg tỹ tag ki kanhró há han kỹ ẽg tóg ti to tar nỹtĩ, ẽg tỹ ti jykre jagma mũ há han jé. ⁴ Kỹ Topễ tóg ẽg mỹ nén ù há tó ja nĩgtĩ gé. ù tóg ẽg mỹ vễnh vĩ há tỹ ge tónh ke tũ nĩ. Topễ tỹ ẽg mỹ vĩ há han ri ke venh ke tũ ẽg tóg nĩ. Tag tó ti ẽg mỹ, ha mẽ. Ẽprã ke kar vỹ nũgme ki vár ke mũ, ãjag tỹ nén to ẽn mũ ẽn han tugrĩn. Ag jãvo ẽg tóg krenkren ke mũ, kỹ ẽg tóg Topễ ri ke nỹtĩnh ke mũ, mỹr, ha mẽ. ⁵ Hã kỹ vãsãn, ãjag tỹ ti ki rã to tar nỹtĩ jé, ãjag tỹ ti ki rã tugrĩn vễnh jykre há hã han jé. Vễnh jykre há han kỹ vễnh kanhrãn kỹ mũmnĩ gé. ⁶ Vễnh kanhrãn kỹ mũ kỹ vễso jykrén nĩ gé. Vễso jykrén kỹ ti tovãnh tũg nĩ gé. Ti tovãnh tũ nĩn kỹ ti jykre hã mũ mũmnĩ gé. ⁷ Ti jykre hã mũ

mũn ky jagnẽ to há tãvĩ nýtĩmnĩ gé, ẽg kanhkã kar ag to. Ẽg kanhkã to há nýtĩn ky ẽprã ke kar ag to há nýtĩmnĩ gé. ⁸ Ẽ jag tỹ tag han kãn ky tóg há tĩ. Ky ẽ jag tóg ẽg Senhor tỹ Jesus Cristo ki kanhrãn há han ke mũ gé, ky ẽ jag tóg vẽn jykre há to krónh ke tũ nĩ gé. Ky ẽ jag tóg komẽr hã ti ki kanhrãn kãn ke mũ, ha vemnĩ. ⁹ Ẽ tỹ vẽn jykre há han sór tũ nĩn ky tóg ãn kyvó ri ke nĩ, ãn ẽvãnh kórég, ãn kutu ri ke ti nĩ sir. Ẽn vỹ ẽg Senhor ki kagtĩg nĩ. Vãsỹ Topẽ vỹ ti kykũnh ja nĩ, ti tỹ Topẽ vỹ mranh ja ẽn to. Hã ra tóg kã jatun ky nĩ ha, hã ky tóg ti kórég han mãn sór mũ.

¹⁰ Inh kanhkã', Topẽ vỹ ẽ jag kuprẽg. Ky vãsãnsãn, vẽn kar tỹ ẽ jag jykre há tugrĩn ki kanhró nýtĩ jé, ti tỹ ẽ jag kuprẽg mũ ẽn ti. Ky ẽ jag tóg tỹ prãnh kenh ke tũ nĩ, ha vemnĩ. ¹¹ Kanhkã ve jé ẽ jag tóg ke mũ, ha vemnĩ, ẽg Senhor tỹ Jesus Cristo tũ ti, ẽg krenkren han tĩ ẽn tũ ti. Tũ' henh ke tũ ti nĩ, ti tỹ tá tỹ ãn mág nĩ ti.

¹² Hã ky sóg ẽ jag mỹ tó mãn', tó mãn' he mũ. Ki kanhró ẽ jag tóg nýtĩ, vẽn vỹ há to tar ẽ jag tóg nýtĩ, ẽ jag tỹ mẽg mũ ẽn to. ¹³ Ge ra sóg ẽ jag jyvẽn mãn sór mũ, ẽ jag tỹ kã jatu tũ nýtĩ jé. Isỹ ẽ jag mré nĩ mũ ẽn kã sóg ẽ jag mỹ tag tó, ẽ jag jyvẽn mág inh. Ky kã jatun nýtĩ tũg nĩ. ¹⁴ Ha vé, kãnhmar sóg iser ky inh fãr tovãnh ky tũg ke mũ, ki kanhró sóg nĩ. Ẽg Senhor tỹ Jesus Cristo vỹ inh mỹ isỹ kãnhmar tũg ke ti tó. ¹⁵ Hã ky sóg vẽn rán tag to fũrũn mũ, ẽ jag tỹ iser kar ky kã jatun tũ nýtĩ jé.

Pedro tỹ Jesus ve ja

¹⁶ Ha vé, inh pi(jé) ẽ jag mỹ ón mũ', isỹ ẽ jag mỹ ẽg Senhor tỹ Jesus Cristo kãtĩg vén mũ ẽn tón ky, isỹ

ti jykre tar tón kÿ. Ti ve inh, sÿ ãjag mÿ nén tó mÿ ti. Ti ve inh, ti tÿ tÿ ùn mág pẽ nĩ ti. ¹⁷⁻¹⁸ Ti jóg tÿ Topẽ vÿ ti tÿ ùn mág han. Ti tÿ tóg ùn tar han gé. Ëg tÿ Jesus mré pãnónh kri nÿtĩ ãn kã ãg tóg kanhkã tá vãnh vĩ ãn mẽg mÿ, ãprã nÿtĩn kÿ. Kÿ tóg ti to tag tó, ù tÿ vãnh kar kri ke ãn ti, Topẽ ti, ha mẽ. “Inh kósin pir hã vẽ,” he ja tóg nĩ, Topẽ ti, Jesus to. “Inh fe pẽ vẽ,” he ja tóg nĩ. Topẽ tÿ pãnónh ki kãtére mÿ ãn kri ke ja vẽ. Ën tá sóg Jesus tÿ tÿ ùn mág jẽ vé.

¹⁹ Hã kÿ ãg tóg ù tÿ vãsÿ Topẽ vĩ tó tĩ ag vĩ kri fig mÿ, tovãnh tũ ãg nÿtĩ. Kri nĩmnĩ gé, ãjag. Lampião grug ri ke ti nĩ ãg mÿ, ag vĩ ti. Lampião grug vÿ ãg mÿ kuty tá jẽngrẽ han ti. Kurã ke kãtã ãg tóg lampião grug ve mãn sór tũ nĩgtĩ. Kurã ke kãtã krĩg mág hã vÿ ãg fe tÿ mrin ke tĩ. Jesus to ken hã vẽ, hã vÿ: krĩg mág, he mÿ. ²⁰ Kÿ, ãjag tÿ Topẽ vĩ rá to ken kÿ tag to jykrén nĩ, ha mẽ: ãg pi(jé) vėsóg ki to jykrén ke mÿ', Topẽ vĩ rá to', Topẽ tÿ ã vĩ tó tĩ ag mÿ nén tó mÿ ãn to'. Topẽ hã ne to ãg krĩn ke mÿ'. ²¹ Kÿ Topẽ vĩ tó tĩ ag pi(jé) vėsóg ki ãjag krĩ ki to jykrén kÿ rán ja nĩgtĩ gé'. Topẽ kuprĩg tÿ ãjag krĩn mÿ ãn hã rán ja ag tóg nĩgtĩ, hã kÿ tóg tÿ Topẽ vĩ nĩ, vãnh rán ki.

2

Ón kÿ Topẽ vĩ tó tĩ ag

¹ Hã ra ù ag tóg ón kÿ Topẽ vĩ tó ja nĩgtĩ gé, vãsÿ, Israel ù ag. Tag ve jé ãjag tóg ke mÿ gé. Û ag tóg ón kÿ ãjag mÿ Topẽ vĩ kãmén sór ke mÿ, ha vemnĩ. Ën ag vĩ vÿ ón kÿ ãjag mÿ mẽ há tĩ mẽ tĩnh ke mÿ, hã ra tóg ãjag kókén ke mÿ. Ëg Senhor tovãnh jé ag tóg ke mÿ, ù tÿ ãg kygiãm ja ãn ti. Hã ra Topẽ vÿ vãhã

ag tỹ tũ' henh ke mũ. ² Ge ra ù tỹ hẽn ri ke ag tóg ag jykre pãno han ke mũ, ag mré. Kỹ ù tỹ ag mré vênh jykre pãno han mũ ãn ag tigrĩn Topẽ jykre kato vĩ vĩ henh ke vễ, tag tỹ mẽ há' henh ke vễ sir, ti tỹ ki hã tó mũ ra. ³ Ag tỹ jãnkamy mág ve sór vễ, hã kỹ ag tóg ón kỹ vễme sĩnvĩ tó sór mũ, ag tỹ ãjag lograr he jé. Hã ra ù tỹ ag vóg kónãn ke mũ ãn tóg ag vэг tĩ. Ag tỹ tũ' he jé tóg ke mũ, kãnhmar, ha vemnĩ.

⁴ Topẽ tỹ jẽgnẽ jafã ù ag vỹ Topẽ vĩ mranh. ãn ag vóg kónãn tóg huri, Topẽ ti. Ag pi(jé) krenkren'. Nũgme ki tóg hur ag vãm, Topẽ ti. Tá ag tóg sigse kỹ nỹtĩ, ferro tỹ corrente tỹ. Tá tóg kuty nỹ. Tá ag tóg Topẽ tỹ vênh kar jykre tugnỹm ke kurã ãn jãvãnh nỹtĩ. ⁵ Kỹ Noé mré ke ag vỹ nỹtĩgtĩ gé. Topẽ vỹ ag vóg kónãn ja nĩ gé. Goj var tỹ tóg ù tỹ ti vĩ mranh mũ ag tỹ tũ' he kãn. Ag pi(jé) krenkren'. Û tỹ 8 (ke) ag tãvĩ vỹ krenkren, ãn kã, hã vỹ: Noé, he mũ, ù tỹ vênh kar mỹ: “Topẽ vĩ kri fimnĩ,” he mũ ãn ti, kar kỹ ti mré ke tỹ 7 (ke) ãn ag ke gé. Ti mré ga kri mũ ù ag vỹ tũ' he kãn. ⁶ Topẽ vỹ cidade tỹ Sodoma tá ke ag, cidade tỹ Gomorra tá ke ag vóg kónãn ja (tóg) nĩgtĩ gé, kỹ cidade ãn tá ãn tóg kugpũr kãn ja nĩ. ãg tỹ tag ve kỹ ãg tóg Topẽ tỹ ùn jykre pãno ag vóg kónãn ke ãn ki kanhró nỹtĩ gé. ⁷ Cidade ãn tá ùn pir vỹ kren, hã vỹ: Ló, he mũ. ãn vỹ jykre há nĩ ja nĩgtĩ, kỹ ti mré ke ag jykre kórég vỹ ti mỹ e nĩ ja nĩgtĩ, tag to tóg krĩ kufy han ja nĩgtĩ. ⁸ Kurã kar ki tóg ag kãmĩ ag jykre pãno ve ja nĩgtĩ, kỹ ti krĩ tóg kufy jagy nĩ ja nĩgtĩ, ti tỹ ag jykre kórég ve kỹ, ag vĩ kórég ke gé. ãn vỹ ã pir mỹ kren, Ló ti. ⁹ Û tỹ Topẽ to: “ùn mág vỹ tỹ ti nĩ,” he mũ ag krenkren han ki kanhró tóg nĩ, Topẽ ti. Hã ra tóg ù tỹ vênh jykre pãno han mũ

ag vóg kónãn ke mũ, ti tỹ vẽn̄h kar jykre tugnỹm ke kurã ên kã. ¹⁰ Û ag vóg kónãn mág pẽ han jé tóg ke mũ, Topẽ ti, hã vỹ: ù tỹ ãjag tỹ nén to én mũ han tĩ ên ag, he mũ, ùn vẽn̄h kavénh tĩ ag, he mũ, ù tỹ: “Topẽ pi(jé) tỹ ãg Senhor nĩ’,” he mũ ên ag, he mũ.

Ón kỹ Topẽ vĩ tó tĩ tag ag vỹ ãg vĩ kafãn tĩ. “Inh hã tóg ki kanhró nĩ,” he ag tóg tĩ. Kỹ ag tóg kanhkã tãn ag kamẽg vãn̄h nỹtĩ gé. Ag to ag tóg vĩ kónãn tĩ, kanhkã tãn ag to, ón kỹ Topẽ vĩ tó tĩ ag. ¹¹ Topẽ tỹ jẽgnẽ jafã ag vỹ tag han tũ nĩgtĩ, ha mẽ. Kanhkã tãn ag to ag tóg vĩ kónãn tũ nĩgtĩ, Topẽ rĩnve, Topẽ tỹ jẽgnẽ jafã ag. Ag tỹ ù tỹ ón kỹ Topẽ vĩ tó tĩ ag tar kãfór nỹtĩ ra ag tóg kanhkã tãn ag to vĩ tũ nĩgtĩ. ¹² Ag jãvo ù tỹ ón kỹ Topẽ vĩ tó tĩ ên ag vỹ krĩ tũ nỹtĩ, vãn̄h kãmĩ sẽ ag jykre tũ ri ke ag nỹtĩ. Vãn̄h kãmĩ tóg tĩgtĩ, sẽ ti, ãg tỹ ti to vãjig kỹ ti tén jé. Hã jé tóg mur tĩ. Tag ri ke ag nỹtĩ, ù tỹ ón kỹ Topẽ vĩ tó tĩ ag. ãjag tỹ kanhkã tãn ag ki kagtĩg nỹtĩn kỹ ag tóg ag to vĩ kónãn tĩ. Hã kỹ Topẽ tóg ag tỹ tũ' henh ke mũ, ãg tỹ sẽ tén tĩ ên ri ke. ¹³ Ag tỹ ãjag jykre pãno kajãm hã vẽ. Kurã ki ag tóg ag tỹ nén to én mũ ên han tĩ, mỹr, ha mẽ. Kỹ ag tóg ãjag mré jẽg tĩ gé, ãjag tỹ festa han kỹ. Ha ra ag tóg nén tỹ ãg mỹ'a han tĩ ên hã han tĩ, ag tỹ ãjag mré jẽn kỹ. ãjag kavénh ag tóg tĩ. Jykre régre ag nỹtĩ, ón kỹ ag há nĩ ve nỹtĩ. ¹⁴ Ûn tỹtã fag kar to én ag tóg tĩ, fag ki êvãn̄h kỹ. Topẽ vĩ mranh sór ag tóg tĩ, ti vĩ mranh to ag tóg krónh ke tũ nĩgtĩ. Ûn krój ag krĩn kónãn ag tóg tĩ, ag tỹ ag mré mranh jé. Ag topẽ vỹ tỹ jãnkamy nĩ. Topẽ vỹ ag vóg kónãn ke mũ, ha vemnĩ. ¹⁵ Topẽ japry ti, ti jamĩn ti tovãn̄h ag tóg, vãgfor kỹ ag nỹtĩ. Beor kósin tỹ Balaão ên ri ke

han ag tóg tĩ. Ęn vỹ jãnkamy to há tãvĩ nĩ ja nĩgtĩ. Hã kỹ tóg ã jykre kórég ěn to jãnkamy ve sór mág ja nĩ. ¹⁶ Hã ra Topě tóg ti mỹ vĩ tar han, ti tỹ ti vĩ mranh kỹ. Hã kỹ ti mēg fi tóg ã vĩ vãnh ra ti mỹ vĩ ja nĩgtĩ, ěg tỹ jagně mré vēmén ri ke han ja fi tóg nĩgtĩ, ti mēg fi. Ti mỹ vĩ kỹ fi tóg ti tỹ vėnh jykre kórég han ke mũ ra tỹ tũ' he mũ, ti mỹ, ũ tỹ Topě vĩ tó tĩ ěn mỹ, ti tỹ ón kỹ Topě vĩ tó tĩ sór mũ ěn kã.

¹⁷ Ón kỹ Topě vĩ tó tĩ ag vỹ goj nĩhỹg ja ki goj tũ ěn ri ke nỹtĩ. Kanhkã góg ri ke ag tóg nỹtĩ gé, kãka tỹ vėjo kanhkã góg ag vóg kỹ tỹ tũ' he ěn ri ke ag nỹtĩ, ũ tỹ ón kỹ Topě vĩ tó tĩ ag. Topě vỹ kuty tãvĩ tá ag vin han ke mũ. ¹⁸ “Ũn mág vỹ tỹ inh nĩ,” he ag tóg tĩ, ón kỹ. Krĩ tũ ag nỹtĩ. Nén ũ vėnhmỹ kar to én ag tóg tĩ, nén ũ tỹ ěg kavénh tĩ ěn to én ag tóg tĩ. Vėnh jykre pãno han kỹ ag tóg ũ tỹ ũri Topě ki ge sór mũ ag krĩn kónãn tĩ, ũ tỹ ũri ěg tỹ kygně kỹ han tĩ ěn tovãnh sór mũ ag. ¹⁹ “Jatun mỹ ěg tóg ěg tỹ nén han sór mũ ěn han kãn ke mũ,” he ag tóg tĩ, ón kỹ. “Topě vỹ ěg to jũnh ke tũ nĩ,” he ag tóg tĩ, ón kỹ. Hã ra ag tóg ěprã vėnh jykre hã mũ mũgtĩ, nén tỹ ěg kavénh tĩ ěn hã han ag tóg tĩ. Kỹ tóg tỹ ag jagrě nĩ, ěprã vėnh jykre ti. Ęg tỹ nén ũ tovãnh sór mũ ra tovãnh ki kagtĩg nỹtĩ ěn vỹ tỹ ěg jagrě nĩ sir, mỹr, ha mẽ. ²⁰ Ęg Senhor tỹ Jesus Cristo ki kanhró ja ag tóg nỹtĩ vė, ěg kren han mũ ěn ti. Ti tugrĩn ag tóg ěprã vėnh jykre kavėj kar tovãnh ja nĩgtĩ vė, ěg tỹ nén tugrĩn ter ke mũ tovãnh ja ag tóg nĩgtĩ vė. Hã ra ag tóg ãjag tỹ nén tovãnh mũ ěn han mãn mũ, kỹ tóg tỹ ag jagrě nĩ mãn mũ sir. Kỹ tóg ũri kórég kãfór nĩ, ag mỹ. ²¹ Ag tỹ Topě japry ěn, ti jamĩn ěn sãn ja tũ nĩ ra tóg há tĩ vė. Hã ra ag tóg ti sãn sĩ han kar kỹ kyrãgrã mũ. Topě tỹ ag mỹ vėnh

vĩ há jĕnĕg mũ ĕn tovănh ag tóg. ²² Ag to ĕg tóg tag tó tĩ, ha mẽ: “cachorro vỹ ă tũgtũv ĕn ko măn tĩ,” he ĕg tóg tĩ. “Porco tóg ă vĕnh kype há han kỹ jĕ ra óré mũ vĕsĩn măn tĩ, kỹ tóg vĕnh kavĕnh măn tĩ,” he ĕg tóg tĩ gé. Ũ tỹ vĕnh jykre kórég tovănh kar kỹ han măn tĩ ag to ken hă vĕ.

3

Jesus kătĩg măn

¹ Inh kanhkă', ăjag to sóg há tăvĩ nĩ. Ăjag mỹ sóg vĕnh rá ũ han huri, kỹ sóg ăjag mỹ rán măn mũ ha. Inh vĕnh rá kar ki sóg ăjag jyvĕn tĩ, ăjag tỹ nĕn jănhkri hă to jykrĕn kỹ nỹtĩ jĕ, ăjag tỹ tag kă jatũ nỹtĩ tũ nĩ jĕ. ² Topĕ vĩ tó tĩ ag vỹ văsỹ Topĕ vĩ tó ja nĩgtĩ. Ĕn mũ ĕkrĕn nĩ. Kỹ apóstolo ag vỹ ăjag mỹ tó ja nĩgtĩ gé, ĕg Senhor tỹ nĕn to ĕg jyvĕn mũ ti, ĕg kren han tĩ ĕn vĩ ti. Ĕn mũ ĕkrĕn nĩ gé. ³⁻⁴ Tag to jykrĕn nĩ, ha mẽ. Kură tỹ ĕgno to hă ĕpră ke ũ ag vỹ ăjag to é henh ke mũ, ha vemnĩ. “Ti mỹ kătĩg măn mũ vỹ?” he jĕ ag tóg ke mũ. “Ti tỹ văsỹ kătĩg măn ke vĕ vĕ, hă ra ĕg jo ke ag vỹ văsỹ tũg, ti tỹ ă kătĩg măn ke tó mũ ra ag tóg kăgter. Kătĩg ke tũ ti nĩ. Ga vỹ nĩnh mũ, tũ' henh ke tũ ti nĩ, ga ti, ha vemnĩ,” he jĕ ag tóg ke mũ, ĕg to é he kỹ, ha vemnĩ. Ũn jykre kórég ag vĕ, ũ tỹ tag tó mũ ag. Ăjag tỹ nĕn to ĕn mũ ĕn hă han ag tóg tĩ. ⁵ Topĕ tỹ văsỹ nĕn han mũ ĕn ki kagtĩg ag tóg nỹtĩgtĩ, ag tỹ ki kanhrăn sór tũ nỹtĩn kỹ. Topĕ tỹ văsỹ nĕn han jan hă vĕ, ha mẽ. Kanhkă han tóg, văsỹ, ga ti ke gé. Ă vĩ tỹ tóg nĕn kar hyn han ja nĩgtĩ, Topĕ ti. Ga ĕn vỹ goj tỹ vĕnh kăpăm kỹ nỹ ja nĩ, kỹ ũ tóg goj kri nỹ ja nĩ gé. ⁶ Ga ĕn kri ke kar ag vỹ hur

tũg, goj tỹ, goj var mũ ãn tỹ. ⁷ Kĩ ãg tỹ ùri nén vég mũ tag vỹ tũ' henh ke mũ gé, ha vemni. Topẽ vỹ ti tỹ tũ' henh ke to kurã nĩm huri, kĩ tóg pĩ tỹ ti tỹ tũ' henh ke mũ, Topẽ tỹ: “tág!,” hen kĩ. Kurã ãn kã Topẽ vỹ ù tỹ ti vỹ mranh mũ ag tỹ tũ' he kãn ke mũ gé. Ag vóg kónãn ke kurã vẽ sir.

⁸ Inh kanhkã', tag to jykrén nĩ, ha mẽ. Topẽ kurã vỹ ãg kurã ri ke tũ nĩ. Kurã pir vỹ ti mỹ prỹg tỹ mil (ke) ri ke nĩ, kĩ prỹg tỹ mil (ke) vỹ ti mỹ kurã pir ri ke nỹĩ gé. ⁹ Kĩ tóg ã tỹ ãg mỹ nén tó mũ ãn tovãnh ke tũ nĩ, Topẽ ti. Û tóg: “han sór tũ ti nĩ, hã kĩ ãg tóg vég tũ nĩgtĩ,” he tĩ, ón kĩ. Hã ra ag tóg hã tũ tó tĩ. Ti tỹ ver ãg to fe nĩ vẽ, hã kĩ tóg kãtĩg vãnh han. Ti pi(jé) ãg kãmĩ ù tỹ nũgme ki kutẽ mũ ve sór mũ'. Hã kĩ tóg ver ãg mỹ kurã ù nĩm mãn', kurã ù nĩm mãn' he mũ, kĩ vẽn kar jé ãjag jykre kórég tovãnh, ag krenkren jé.

¹⁰ Hã ra tóg kãtĩg mãn ke mũ, ha vemni. Vãhã tóg kãtĩg ke mũ, kĩ tóg ù tỹ ãg tũ péju(g) tĩ tỹ ãg vatãnh tá kãtĩg ri ke nĩnh ke mũ. ãn kã kanhkã tóg tov kĩ kréj ke kĩ vár ke mũ. Kanhkã tá nén kar vỹ jonh ke kãn ke mũ gé, krĩg kar ag, pĩ ãn tỹ ag tỹ kréj ken kĩ. Kĩ vãhã ga vỹ tũ' henh ke mũ, ga kri ke kar ag ke gé. ¹¹ Ge kĩ nén (ũ) kar vỹ tũ' henh ke mũ. Hã mĩ êkrén kĩ vẽn kãn sórmnĩ. Topẽ tỹ ãg mỹ nén tó mũ ãn hã han nĩ. Topẽ mỹ vẽn vin nĩ. ¹² Topẽ kurã ãn jãvãnh nĩ, Topẽ rãnrãj to vãsãnsãn nĩ, ti kurã ãn tỹ kãnhmar tá krỹg jé. Kurã ãn kã kanhkã vỹ pũr ke mũ, kĩ kanhkã tá nén kar vỹ jonh ke kãn ke mũ gé, krĩg kar ag. ¹³ Topẽ vỹ ã tỹ ãg mỹ nén tó mũ ãn han kãn ke mũ. Kanhkã tãg han jé tóg ke mũ, ga tãg ke gé. Tá tóg vẽn jykre kuryj tãvĩ nĩ. ãg tỹ ga tãg tag,

kanhkã tãg tag venh ha pê tóg tĩ.

¹⁴ Inh kanhkã', ãjag to sóg há tâvĩ nĩ. Topẽ kurã tag jãvãnh kÿ ãjag tóg nÿtĩ. Kÿ vãsãnsãn nĩ, ãjag tÿ kygnẽ tũg jé. Vãsãnsãn nĩ, ãjag tÿ Topẽ mÿ jãnhkri nÿtĩ jé, ãjag tÿ ti há ri ke nÿtĩ jé. Kÿ ãjag tóg ti kato vãsãnsãn tũ nĩ. ¹⁵ Ha vé, ti tÿ ver ãg to fe nĩn hã kÿ ãg tóg ãg jykre kórég tovãnh kÿ krenkren ke mũ. Tag rán tóg huri ãjag mÿ, ãg kanhkã tÿ Paulo ti. Ti to sóg há tâvĩ nĩ, Paulo to. Topẽ vÿ ti mÿ krĩ há tâvĩ nĩm. ¹⁶ Kÿ tóg, ti tÿ ù mÿ carta han kÿ tóg isÿ nén rán mũ tag ri ke han tĩ gé. Ti vĩ tóg inh vĩ ri ke pê nĩ. Carta e han tóg huri, Paulo ti, kÿ ti carta ù vÿ to jykren jagy tĩ gé. Kÿ ù ag tóg ti carta to ke mũ ra ki kagtĩg nÿtĩn kÿ ti to vĩ kónãn sór mũ. ù tÿ ki kagtĩg ag vẽ, ùn krój ag vẽ, ù tÿ Paulo tÿ rá to vĩ kónãn mũ ag. Topẽ vĩ rá ù to ag tóg vĩ kónãn tĩ gé, ãn ag. Tag tigrĩn ag tóg kãgter ke mũ, ha vemnĩ.

¹⁷ Inh kanhkã', ãjag mÿ sóg rán kãn huri. Hã kÿ vẽnh ki rĩr há han nĩ. Ker ù tÿ ãjag mÿ ón kÿ kri nĩm hẽ'. Ke tũ nĩ mũ ra ag tóg ãjag lograr henh ke mũ, ù tÿ ãjag fe kavénh sór mũ ag, ùn jykre pãno ag. ãjag tÿ ag vĩ kri fi tigrĩn ãjag tóg vãgfor ke mũ, ha vemnĩ. ãg tÿ kãgnó ki tĩr ri ke han jé ãjag tóg ke mũ, ha vemnĩ. ¹⁸ ãg Senhor ki kanhrãn ke hã to tar nÿtĩm nĩ. Ti tÿ ãg tar han mũ tag hã ve sórmnĩ, ãg kren han tĩ tÿ Jesus Cristo ti. Ti hã mÿ ãg tóg vĩ há han ke mũ, ùri, kar kÿ kanhkã tá ke gé, kÿ tóg tũ' henh ke tũ pê nĩ. Amém.

Topẽ vĩ rá **New Testament in Kaingang (BR:kgp:Kaingang)**

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-04

PDF generated using Haiola and XeLaTeX on 21 Feb 2024 from source files
dated 29 Jan 2022
16af52c8-0e45-5e91-b36c-cd314d36d7fc